

## 东鲁郡颜氏族谱总序（山东）

颜氏之先出自黄帝轩辕氏，公姓长于姬水，以姬为姓，娶西陵氏女名嫫祖为帝元妃，生昌意，昌意娶蜀山女曰仆，生帝高阳，帝高阳娶胜溃女，生青，青生卷章，卷章生吴回，吴回生陆终，陆终生六子，一、昆吾，其国卫，二、参胡，其国韩，三、彭祖，其国徐，四、会人，其国郑，五、晏安，其国邾，六、季连，其国楚。晏安为曹姓，历唐虞夏商不能记其传，至周武王克商，封其裔孙侠为邾子，侠生辉，辉生成，成生辅车，辅车生将新，将新生訾父，訾父生夷甫，字伯颜，谥武公，生子友，别封郕，为小邾子，遂以父字颜为氏。以其附庸于鲁，故世世事鲁，为卿士大夫焉。友生爽，鲁下大夫，爽生连，连生噉，噉生鸣，俱为鲁上大夫。鸣生音，为鲁司寇。音生羽，羽生训，训生简，简生箱，俱鲁下大夫。箱生翹，翹生景，景生整，整生恤，恤生求，俱鲁司寇。求生有，为鲁邑宰。有生无繇，字路，谥文裕，为鲁卿士，娶齐姜氏，生回，字子渊，娶宋戴氏女，生歆。回从学孔子，才冠七十二贤，惜年不永，悼道无传，近壮而发白，越数年歿。生鲁昭公二十一年庚申十一月十六日丙申，卒鲁哀公五年辛亥八月廿三日丁巳，年三十二。孔子哭之恸，鲁哀公吊焉。葬鲁城东防山南。迄今颜林蔚蔚，春露秋霜享祀不忒，而其宗子世系採入谱图本交百世，颜氏之渊源按图而知，爱敬之心自有不能已者焉。

